

增修肥壤縣志

壹 安亮清題



辛巳荷月

肥兒雙目心木

安亮清題



北長街前宅胡同六號
北京友文印書局承印
電話南局二〇四二號

續修肥鄉縣志序

志者所以志往也志往卽所以勸來邑之有志與國之有史記家之有譜書相爲表裡也國無史則一代之典章文獻弗傳家無譜則一族之世系宗派不明邑無志則一方之風土民情罔悉我肥邑自事變以還亮清受命於危難之際披星戴月督促員夫築城垣立校修廟等建設日趨明朗化若不有以志之則武備與文治恐垂後無所稽湮沒而不彰况列憲之徵集縣志文電頻催急待考核失今不圖將何以應命而啟考成此乃蒙泉剝果之機亦革故鼎新之象天下事固有待其人而後成人固有待其時而後興者肥邑志之續修肇端於民國十五年冬歷三載未竟全功今經上峯督飭本修廢舉墜之熱忱爲補偏救弊之至計始得整理而完成之爰述其崖略以弁諸簡端俾僉爲記

肥鄉縣志

序

序

縣之有志書猶國之有史乘也我縣雖有舊板志書自經事變多遭焚燬今新政權成立興亞運動肇始
亮清承乏桑梓屢奉

道省兩憲及石門特務關長以縣志見索是以特派本署教育科長翟清傑博訪周諮加緊徵求歷數月之久始僅獲舊板志書一部惜仍難以報命爰於三十年春三月將舊志攜帶北京按照原板稍加審定缺者補之繁者芟之先付鉛梓印數百部以供

列憲之參攷而存本縣之文獻至於近代事蹟俟容商諸僚佐紳耆假以時日再行陸續纂修另刊問世現雖稍爲補輯惟在修廢舉墜以求關於世道人心社會進化足資參考采徵云爾是爲序

皆

中華民國二十九年歲在庚辰孟冬之月上澣肥鄉縣知事安亮清序

肥鄉縣志

序

續修肥鄉縣志序

前省郡州縣皆有志志者何記事也記事者何記是邦之疆土風俗政治人物諸大端用以爲激揚懲勸觀感興起之稿本也春秋史鑑互相表裏豈徒鋪張盛事云爾哉十五年夏江蘇陶公叔仁檢閱縣志與各界士紳會議續修委鄭紳溱英與錄任編輯暨同邑諸紳分任採訪校正抄錄各職務無何陶公以辭職去任紅槍會變忽起鄭紳溱英亦病卒其事遂寢至十八年南皮張公芻青來攝肥篆復委錄與程紳瑞徵任編輯而公則居中總其大成是肥志經始於十五年冬告成於十九年春凡歷三載統舉前清同治六年以後至民國十九年以前六十餘年之新舊各門編纂成書雖墨澀筆荒不逮先哲遠甚然據事直書仍使此邦之疆土風俗政治人物諸大端得所憑依並使激揚懲勸觀感興起之稿本無傷廢墜不避繢貂敢與附驥其於後之徵文獻考掌故者或不無小補云爾噫是書之成不成於紅槍會變起之先而成於北伐成功之後陶公創其始張公總其成一若有數存焉則書之成豈偶然哉錄因是有感矣清康熙二年焦公之續修也爲明清兩代之易姓同治六年李公之續修也爲咸同兩朝之戰守此次之續修也爲專制與共和之改革所謂結晚清之殘局開民治之先聲非歟爰操觚而爲是序

時在

肥鄉縣志

序

民國十九年春邑人李國鐸序

重修肥鄉縣志序

錦川王公建中字懋庵余之鄉先達也雍正庚戌曾知縣事修城池創衙署興學校建營房自舊店營移復舊治又因縣志缺略銳意重修考獻徵文以備掌故迄今一百三十七年矣同治丙寅十月余攝篆茲土甫經下車諸紳士以修誌請蓋以余係懋庵之同鄉而以懋庵之事望於余也余披閱誌書雍正壬子以前事尙詳備自時厥後政事之興廢典禮之沿革人文之蔚起節孝之流傳代遠年湮無從稽考况近年兵亂頻仍楊樹屏觀察飭戎行以備不虞練堅陣以摧巨寇修城垣以固封守褒忠義以建崇祠豈可聽其湮沒無傳廢墜不舉乎因允其請而以秉筆託之學博趙君鯉門趙君在任六年學問文章久爲諸紳所景仰而又久與樹屏觀察共事武功文治知之審言之詳也書旣成體例精嚴筆意簡核一百三十七年事迹展卷瞭如是雍正壬子以前肥鄉以懋庵爲轉關雍正壬子以後肥鄉以樹屏觀察爲轉關有此誌樹屏觀察之功以傳有此誌而諸紳士以懋庵之事望於余者不有以酬其願哉余履任半載一切善政愧不能繼懋庵之後爲閭里榮猶幸舊誌重修假手以告成功與懋庵後先相映此若有數存乎其間焉不然前任能文者多矣何以考獻徵文以備掌故兩次皆錦州人也

皆

肥鄉縣志

序

三

同治六年歲在丁卯端陽前五日五品銜署肥鄉縣事遼西李鵬屏序於官廨之鴻雪堂

重修肥鄉縣志序

肥鄉舊志自雍正壬子重修迄今一百三十七年矣時移勢易制度屢更一切官司之所守典禮之所關已有月異歲不同之勢况兵興以來修城垣除戎器教陣法練鄉兵興書院以振文風建學宮以崇儒術以及鄉民好義爲國捐軀勇士從軍同仇敵愾死者之忠魂飄泊生者之偉績昭垂若不爲之表揚登之簡冊何以激英雄之氣而慰節烈之心乎濂自辛酉九月抵任縣志久闕與楊樹屏劉光陸共議重修兵亂方殷無暇及此同治癸亥光陸以終養歸甲子正月樹屏以陞任去事遂中止濂屢與諸紳士提及因循未果丙寅十月李挹汀抵任諸紳士以志書請挹汀慨然應允籌經費定章程而委濂秉筆爲時既久房稿殘缺考核無從乃搜舊家之譜牒訪古廟之碑文問先賢遺事於子孫咨月旦鄉評於父老有善率錄不以微末遺也核實以求不以情面濫也自十一月十九日開局迄丁卯四月二十一日書成條分縷析悉有成規綱舉目張別開生面一切官司之所守典禮之所關以及修城垣除戎器教陣法練鄉兵興書院建學宮慰忠魂褒偉績諸大事無不燦然明備而一百三十七年之闕典有以補其弊而救其偏則樹屏光陸有志未逮者挹汀不觀厥成哉濂執鉛槧得附驥以傳亦云幸矣

欽加五品銜卽選教授肥鄉縣教諭古道趙文濂序

肥鄉縣志

序

四

舊志序

鄒公理曰今之志古之史也叙事紀物式類辨宜考往例後匪志罔具地理無志山川之區域風俗之趨向無從稽矣建置無志公署之品列郵梁之次第無所辨矣學校無志士無定習而教化不宣矣田賦無志歲出不經而征或橫暴矣祠祀無志鬼神廢饗而民或詔贖矣職官無志勸鑒之道湮矣人物無志淑慝之實素矣選舉無志賢俊罔昭而士不知激矣古蹟藝文無志地之勝槩泯而士之精華鬱矣茲非縣之缺典而吾有司之責歟顧踈庸蒞官酬應期會日不暇給成吾事者其惟諸士大夫乎遂以托諸蔣君聲之郭君于京喬君如松蔣君善之越明年戊戌夏五月朔秩始成嗚呼志也者識也識以備觀觀以彰教教以風遠文實兼備謂之精實不稱文謂之誣文不稱實謂之儻精固可以觀可以教可以風矣苟詘焉儻焉與觀教風乎何有

邑人郭鄒曰肥鄉或以此爲蔡臯狼地或以趙陵爲平原君塚或又以周處三害爲本縣忠烈考之史記與大明一統志皆未可盡信闕之可也

商公誥曰天下名山大川分隔疆域而所生之人各得其山川風土之氣故剛柔緩急之性因方而殊以古趙之國言之南視大河西倚太行規模氣勢鎮重踈達其人之所稟論者謂其慷慨悲歌慕義彊仁舊

肥鄉縣志

序

矣肥鄉趙域也予蒞官茲土旋以公事徧歷鄉野見其民之質朴而不浮坦率而尚氣古人之遺風猶存焉勃然有因俗化導之心訪其故典時事皆茫茫乎不能言其槩乃竊悼之夫爲政者欲撫其民集其事鼓其風教必先於統御之所不及者使凡成規體要各喻於心然後區處條理不相違背上便於施下便於守所爲而成所謀而遂宰官守郡領藩相國其理一也然則邑志之修固可緩乎前尹臨川鄒君亦嘗修之歲久事更難相沿也乃延數良士館諸公所給其資用遠稽近考萃爲此書一縣之中數百年之事燦然如指諸掌雖弛張聽斷如權衡度量稱較百物化裁以盡變者固不專於此而其故典時事法定守達於上下於予因俗化導之心亦庶幾有所助矣抑予猶有說焉邑之封域絕長補短將六十里其地以頃計之僅三千四百頃其民以丁計之僅三萬五千丁歲之所出租稅工食之類用銀無慮四萬兩而奇差冗費不與焉民兵皂隸之屬應役無慮二千人而里書保甲不與焉所餘之財方得以給其私所餘之力方得以營其家雖大熟之年其用不豐而況於中熟下熟也哉而況於災變相仍也哉則恤其困苦而保育撫綏之者不能不戚戚於心矣此予之所深感而兼有望於繼茲任者也爲吾民者其亦以勤儉而自勵乎

廉公靖曰邑制之沿革風俗之靡儉政事之興廢則前序已載之矣勸懲乎善惡維持乎民風進退乎吏治之臧否足以淑人心昭永鑑則大司馬張公序又備言之矣抑余竊有說焉孔子云君子學道則愛人

苟爲宰者一民一物痛癢相關真如慈母保赤子是眞能學道者也是眞能愛人者也不則剝民賦上謀進榮家縱博一時通顯其於孔子之訓遠矣余令邑三載無善狀顧念舍學道則無善學舍愛人則無善治舍聖訓則無善師敢以此望之將來之君子并質諸邑之賢士大夫云

邑人張學顏曰余惟國家肇域四海英廟正統五年命儒臣纂修一統志已載在秘府後諸守臣又將諸邊及各省郡邑自爲一志煙火萬里遠近分合犁然如指諸掌自三代後輿圖廣大未有如今日之盛者然先朝吏治舉士風正民生安二百餘年設官取士如故議者每言今不逮昔則分野分疆域考實在志而經綸輔相在人可知矣官茲上者宜朝廷德意體閭閻休戚預遠苞苴力絕關節以恩信撫民以禮法待士政權無旁落胥吏無上侵田賦必清無容詭冒經費必正無溢額供刑罰必當催科必時積儲廩庫足備歲凶慎防城櫓足消萌變俾居者悅徙者還不善者化爲善者安是志卽官之箴也產茲土者父子慈孝相依兄弟友恭相與朋友德業相勸夫婦和敬相成處鄉法謙謙君子出仕效蹇蹇王臣勿挾勢力虐孤微勿逞巧詐陷笮獨無爭訟以叢殃無淫朋以敗俗尊卑貴賤循分親疎長幼守法是志卽家之範也若不奮發興起以自外於良吏良民志何益於邑哉

焦公服祖曰志與史同科古有史無志黃帝立倉頡爲左史沮誦爲右史周有內史外史大小史之屬不聞以志也孔子作春秋凡會盟征伐日食星隕螽蟻無冰之類無不悉書則聖人垂世大經實爲後代作

肥鄉縣志

序

一

志之祖迨班固變八表爲十志而志遂與史並重矣王通訊史遷之失謂其紀煩而志寡陳壽三國未愜輿望則志誠有難言者哉肥志遠不可攷在明始於鄒公理廉商二公相繼修補尙多脫誤夫寰宇之內名山大川神臯輿區不可勝數其以肥稱者如衛詩之肥泉因水獲名春秋之肥子國因氏獲名廣武之肥舊志戰國肥義傳趙惠文王而死其難後人嘉其烈因名其地曰肥鄉然竹書紀年於梁惠王八年已言伐鄆鄆取肥矣是肥之名其來已久豈至魏黃初時始立哉余作牧三年日逐逐於簿書愧乏子長孟堅之學暇時與邑中仁賢較論今古念肥曰壬戌漳水沉城後井幹漂沒典冊淪喪未嘗不嘆七十年間無人起而任厥事者矧代變時更忠義節孝不乏鵲起有月且已彰而董狐未載有輿論已符而俎豆未列皆長吏責也又值爾來河伯澎湃環堤布野浸城灌郭勞勞疏塞宵旦無寧晷有志未伸幾同道旁築室茲承許臬司大人意旨爲尙史事乃延邑紳賀公懷菴偕一二同志效殷周採彼家人法梁益詢諸故老廣蒐博訪彙輯成篇擴前志所未備爲古闡幽芳爲今存直道至瓊逸難錄復作志餘百種以附簡末昔王子有拾遺葛稚川有雜紀不妨細收也後之生斯土者或景旋馬高風或慕食客雅志或流連孝子之墟鬢眉欲生或憑弔貞女之墓指髮欲動其人往其音留固赫赫若前日事也余方嚴加檢較鳩功授劄劄客有難之者曰國家肇域四海無此疆彼界之殊自有大匠操斷哀聚九有全書奚一嚮之足嗜余應之曰泰山不讓土壤故能成其高江河不擇細流故能成其大隋經藉志曰西漢之時天下記書先上

太史及光武復詔南陽撰作風俗故沛三輔有耆舊節士之序魯廬江有名德先賢之贊斯皆郡國之書並爲纂述之助傳云善志不言誰知其志是役也非敢藉手以垂不朽夫亦略存其槩以當舉股之附云爾

訪志檄文

邑人賀應旌

竊惟志者繫文獻之總歸稱左狐之別體分疆畫域國有春秋紀事編年人標月旦豈徒侈此邦之勝槩供永日之臥遊已哉凡以驗風俗考形勢鏡得失昭勸懲用世者酌乎古斯準乎今憂民者披其圖如履其境節廉忠孝感物斯興禮樂兵農隨時可布人心嘉賴世道攸關况我肥鄉古稱望縣星分昂畢之墟人吐燕趙之氣山連葛藜忠臣面貌如生城枕浮邱公子岡壠可眺李文靖爲宋朝之眞聖人竇漢卿實元代之古君子橋梁廬舍居然章令花封旗幟犁鋤髣髴劉侯桑野人文接武吏治聯翩在冀北雖屬偏方於畿南實爲勝地無奈陽候肆虐城社頽傾典籍與之銷沉老成因而隕謝問百年來之人物寥如晨星攷歷代後之文章飄同斷梗因革損益咨訪何從治亂興衰徵求安在况易代紛更之初正傳聞益外之日逮今不網羅舊文蚤圖蒐輯而日月如流草木易腐致令撫臺山邯水之風流無從寫慷慨悲歌之生面人樂因循責將誰屬不佞生於斯長於斯業爲邪許之唱而見異辭聞異辭豈乏聲求之應况邑中之高明固多而一人之耳目有限特署楮候以代咨訪倘或家藏名宦先賢之藝文孝子節義之事實祖

肥鄉縣志

序

三

父歷官之顯績耆碩聞見之災祥勿曰事細無補綱常勿曰談鄙無裨治化勿曰匹夫小善不掛名賢勿曰教外別傳不關至極兼收並蓄積土成邱彙種分門學川至海勒成一邑之完書用垂千秋之炯鑑他日貢之太史懸之國門豈惟勝事不致無聞抑亦人心有裨勸戒附青雲而垂不朽是所望於象賢之子孫唱白雪而和國中寧無待於扶杖之父老引領吮墨布告同人撫實傾囊俯首聽命

原序

邑之有志所以昭信而傳遠凡建置沿革山川經界田賦戶口吏治風俗人物文章皆得以書誠鉅典也歲在壬子余奉

命巡察畿南三郡行部至廣平府屬肥鄉縣入其境沃壤平衍覘其俗淳朴厚重有閭紳士父老伏謁車前咸稱王邑宰善政蕃多功業懋著我肥邑自康熙四年漳水衝城官署移於舊店營民舍 題奉部議俟水涸後仍令地方官設法修復上年興工今已落成民甚便之敢告語畢以次退抵其邑閱城廡倉庾行館宏壯備具謁

文廟見殿廡巍煥丹雘燦然進諸生宣講

聖諭暨環堵而聽者熙熙皞皞由是益知

聖朝教澤之深得人之盛若此惟志尙未輯恐無以垂後繼前而王君果以志告成請余爲序余奚能辭夫俊偉卓越之才多乘時而輩出興廢舉墜之事尤待人而後行肥治經水之後漠然於荒烟蔓草中幾七十年歷官斯土者豈無計及而因陋就簡遷延以至於今乎王君蒞治詢謀僉同毅然爲之戒畚鍤均勞逸百堵皆作量事期慮財用跂翼翬飛不勞而集以約而堅超前軼後是誠不可不爲

肥鄉縣志

序

四

之特書也詳載諸志足以昭信而傳遠宜也抑余更有慕焉余家世居洛程夫子以理學名儒出倅澶淵講學造士開水田以利民生教澤之遺至今士庶猶沐其德於不衰肥邑距澶州二百里許今王君蒞茲土百度維新方之吾鄉程子安在古今人之不相及耶遐考是邑人物如李文靖之相業竇文正之經術彪炳史冊皎同日月矣王君以名宦列叙其次庶幾並光邑乘也後之官斯土者亦將有感而興起也

皆

雍正十年歲次壬子清秋

賜進士出身翰林院檢討

欽差巡察順廣大三府等處地方山東道監察御史協理山西道察院紀錄二次洛陽李學裕撰

原序

古列國之書皆得稱史自秦漢以來罷候置守令于是史事領諸朝廷而郡邑稱志也者所以紀風土辨政教述山川稽人物垂法誠作國史之張本也是故記載不詳則不足以備攷事蹟不直則不足以信後文采不彰則不足以傳遠廣平府之屬邑肥爲勝地自宋元以迄於明儒賢接跡人文蔚興將相之勳名輝映簡冊風俗之淳美冠絕畿南是烏可無鴻文巨筆制作成書上以資職方之搜討下以備廣輿之核博乎考肥之有志始於明嘉靖之戊戌邑令鄒公理再修於嘉靖之辛酉邑令商公誥自萬歷及我

朝亦嘗一再續修之肥之志由來遠矣獨至康熙之乙巳肥之志可以不作矣何也志者紀也其中或因其事或因其地或因其人而筆之文以紀之欲其詳不欲其略欲其實不欲其虛欲其文不欲其俚昭重典也肥自漳水衝突沒爲荒區有封疆而無城郭有政事而無治所有教化而無學宮有積貯而無倉廩有祀典而無壇廟卽舊志所紀徒爲虛器雖有史才如遷固則發摭無端馳騁失具有文無質縱極典雅巨麗無益也肥之志可作乎哉余自庚戌承乏斯邑簿書之暇取邑志而披閱之扼腕之情發於不自己因與邑之同志者商之銳意興復自亥之春及子之秋而肥之百廢具舉焉是時邑之人士

肥鄉縣志

序

五

進而爲余言曰公盍修志以紀新猷余曰唯唯但余以一身膺百里寄兼攝郡丞事卽欲從事丹黃馳驅翰墨而案牘山積何暇專意爲之因延邑中良士館諸公所資其日用俾得廣搜博採輯續成編余亦時加筆削於是鏡之梨棗凡三月而告竣焉展卷之餘第見城署之復舊學校之更新賦役之維均道里之各便人物之輩出科目之繼興以及忠孝節義可以維持名教者更不乏人不特此也并紀其鳩工之日庀才之數若者易其規若否仍其制疏列詳明燦若指掌由是向之無城郭者今日雉堞巍然矣向之無治所者今日廳事煥然矣向之無學宮者今日泮藻增輝矣向之無倉廩者今日米粟充棟矣向之無壇廟者今日神歆其享矣肥之志又安可不作乎哉獨是志之作非以踵事而增華實以光前而傳後故紀載必取其詳事蹟必求其真文采必欲其彰上以宣治化次以肅官方次以勵風俗因其既往以戒將來豈徒侈談興造矜一己之能以誇耀於簡編哉後之官斯土者洞鑒余衷勿以爲國爲民之意視爲矜才炫美也則幸矣書成因爲跋以附於後

峇

雍正十年歲次壬子仲秋

賜進士出身文林郎知肥鄉縣事署理廣平府同知錦川王建中序

舊志纂修姓氏

初刻明嘉靖十七年戊戌纂

知縣臨川鄒公理

邑人蔣良金 郭 鄣 喬 年

蔣良寶

二刻明嘉靖四十年辛酉纂

知縣平原商公誥

邑人梁 桐 郭崇嗣 杜 樸

李時芬 李天爵 張思忠

三刻明萬曆十八年庚寅纂

知縣鄱陽廉公靖

邑人張承祚 郭 櫟 張鳳苞

梁 遜 李俞達

肥 鄉 縣 志

姓氏

六

四刻康熙二年癸卯纂

知縣泌陽焦公服祖

邑人賀應旌 賀應旂 張祖岱

郭鳳翱 李貞吉

五刻康熙四十九年庚寅纂

知縣開原許公國棧

邑人李 載 張瑞生 李 旃

六刻雍正十年壬子纂

知縣錦縣王公建中

邑人宋 錦 程囊錦 李爾琮

張抱琦 玉季冬 宋建業

七刻同治六年丁卯纂

知縣寧遠州李公鵬展

涑水趙文濂

邑屢遭漳水版既漂沒書亦散亡故家遺室鮮有存者即間有殘編斷簡皆模糊甌脫不可辨其年月姓氏僅得錄傳如左用不忘首事之功亦聊以開後起之意薪續燈傳此道不至隕落其於一邑聲教風化相助爲理豈曰小補舊志

八刻民國二十九年庚辰纂

知事肥鄉安公亮清

肥鄉縣公署秘書許耀東

大名縣舉人李仲平

邑遭兵燹舊志焚汨經徵索數月幸僅獲一部因簡編斷爛難以報命今稍加補輯以供 列憲參考而存本縣文獻亦不無小補

肥鄉縣志

姓氏

七



肥鄉縣知事安亮清

姓名 安亮清字明軒

學歷 福建軍官學校畢業

經歷 歷充福建第十混成旅少校副官第

十三路大隊長山西暫編第二師副

師長肥鄉縣治安維持會會長公安


科長兼保衛團副總團長治安部第

二十七區聯防主任現任肥鄉縣知

事等職

安公明軒小傳

安公亮清字明軒，河北肥鄉縣人也，現年三十八歲，畢業於福建軍官學校，性孝友，好周急，心胸豁達，智勇兼賅，有膽畧，善交際，諸凡勤謹，曾充福建第十混成旅少校副官，第十三路大隊長，山西暫編第二師副師長等職；所在成績卓著，口碑載道，民國二十六年日華事變，戰禍波及肥鄉，民衆流亡，備極慘苦，適安公在肥，目覩心傷，乃不避艱險挺身出而維持，支應友軍招撫流亡，並籌鉅帑，施粥放賑，捨衣濟急，設所收容，難民來歸，如鯽過江，依公爲安，秩序井然，嗣由維持會長轉任肥鄉縣公安科長兼保衛團副總團長及治安部第二十七區聯防主任對於地方治安頗多建樹，深爲民衆所稱贊，詎料匪共蹈隙陷城，安公不得已離肥，暫在邢台辦公，旋以有功地方，奉委知肥鄉縣知事。于民國二十七年秋後，隨同友軍蒞肥，收復縣城，時當大亂甫定，伏莽遍野，念及守土有責，遂築城，修路招募警隊，勸導四鄉組織保甲自衛團，守望相助。勤縣政，滅匪患，不遺餘力，由是宵小斂跡，匪共竄逃，所謂安居樂業者，實賴安公之力也。肥邑全民因感安公之德，曾豎「澤被群生」石碑及匾額多方，以爲頌揚而誌永久焉。



肥鄉縣公署顧問安座間淳